

## Htawm tem' ri tuil' ri muk kon' Hkrit Hte'salo'ni' ok' keuhti

<sup>1</sup> Htawm ti ok' aen' na ko', meuh a ku' Paw'lu, Silas' mae' Ti'mo'se tem' ye ri tuil' a ri muk kon' Hkrit Hte'salo'ni' na' pe' ri hk'a'naee Kuiing' Peucawo' mae' Cawo' Yesu' Hkrit Eun.

Kah mun' sin' mae' hk'a' kuit nyawk' kuit sam'ran cumyen' na' kue' ri pe' reu'.

*Hk'a'yum' ce muk kon' Hkrit Hte'salo'ni' na' seutuin seutan laws' ka*

<sup>2</sup> Yam hk'o' ye mun' ku pok ka na', ye hk'o' mun' pun pe', mun' keuting ri Peucawo' Eun pun pe' laleung. <sup>3</sup> Nanggal' Eun Kuiing' Peucawo' e' na' saec' meuh yamnhaw' ye kuit rot ri kan' ku' yeuh pe' hk'a'naee hk'a' yum' na', ri kan' katcin yeuh pe' hk'a'naee hk'a' leumeus' keus na' mae' ri hk'a' yeun' hkam' pe' hk'a'naee keutui' hpum' pe' Cawo' e' Yesu' Hkrit Eun na'.

<sup>4</sup> Ec'awng' Peucawo' leumeus' Eun na' pe', yawng ye Peucawo' leuk Eun ri ti pe'. <sup>5</sup> Kopti leukah' mun' ren'kawn sangsawn' ye na' rot a ri pe' a hkuin' caee ri meuh leukah' palkoe, daecti a rot ri pe' ri ti'ca, ri Cit' seunga' chak' mae' ri hk'a' yum' keutawn' nyawk' na'. Yam ut' ye mae' pe' na', punta kaw a kue' mun' pun pe' na' ye ci' a'yu im' mae' pe' yeuh sa'nhaw' na' pe' ku yawng a yeut. <sup>6</sup> Pe' hot' ri yeuh ku' yeuh ye na' mae' ku' yeuh Eun Peucawo' na' yeut. Pe' saec' pun ri hkam' ku' tukhka nyawk' na', pe' ku rap ri ti leukah' mun' ren'kawn na' mae' hk'a' ren'kawn ku' Cit' seunga' chak' na' tuil' ka ri pe' na'. <sup>7</sup> Kop awn' na, pe' na' keut' ri meuh vang rin ri ti pun ce peue yum' ut' nang

kuing' Masido'ni' mae' kuing' Ahkaiya' na' ce gawm'euc'.  
<sup>8</sup> Leukah' mun' Eun Peucawo' ku' pucti lih neum pe' na' a hkuin' caee laws' heul' nang kuing' Masido'ni' mae' kuing' Ahkaiya' na' palkoe. Daecti hk'a' yum' pe' Peucawo' Eun na' a seutuin seutan laws' heul' ku duih' ka. Kop awn' na, ye hkuin' laee kue' ku' lah' ri lawng aen' na<sup>9</sup> kopti pe' ci rap ri ti ye yeuh sa'nhaw' na' peue awn' lah' ris ce a. Pe' ci hpawt' ri tec ruphtu na' yeuh sa'nhaw' punta kaw pe' ing' yeuh kan' Eun taengtaeng Peucawo' Cawo' a'yu im' na,  
<sup>10</sup> mae' punta kaw pe' ko' Kon' ai' ku' kaw lih neum kuing' pang ma' ku' Peucawo' yeuh Eun Eun tang kuh' im' hk'ai' vang yeum ri na' Eun, ce ku ris a yeut. Eun meuh Yesu' Cawo' kaw teum'kawm e' lawtpon hk'ai' hk'a' seungeueng' Eun Peucawo' kaw ing' rot na' Eun.

## 2

### *Kan' Pawlu yeuh eun nang veng Hte'salo'ni'*

<sup>1</sup> Ec'awng' na' pe', pe' ku yawng ing' ye ri pe' na' un' meuh a ku' hk'o'hk'awng'. <sup>2</sup> Seun' yawng pe', nanggal' aen' ce pun ye ri hkam' ku' tukhka mae' ku' un' nawpsang nang veng Hpi'li'pi' na'. Daecti kopti Peucawo' e' na' teum'kawm Eun ye na', ye saec' pun ri hkam' ku' ham'tap na' a'neng, ye hpum' hat'han' sangsawn' leukah' mun' ren'kawn Eun Peucawo' na' ri pe'. <sup>3</sup> Kopti leukah' sangsawn' ye na' a hkuin' laee ing' neum vang keutui' hpum' kleuc', a'ko' vang keutui' hpum' hk'aw'jeuk. Ye ku un' co'ca' ri cop' pe'. <sup>4</sup> Daecti ye sangsawn' a hot' seun' ku' Peucawo' kah Eun ye sangsawn' na', kopti leuk Eun ri ti ye mae' kah Eun ye sangsawn' leukah' mun' ren'kawn na' ri pe'. Ye hkuin' co'ca' ri yeuh ku' kaw hit' hpum' peue, daecti ye co'ca' ri yeuh ku' kaw hit' hpum' Eun Peucawo' Cawo' caet ri nawk hpum' e' na' Eun. <sup>5</sup> Pe' ku yawng punta kaw ye yeuh peue ren' mae' ti ye yeuh a na', un' duing yeuh ye

a. Ye ku un' duing mo' ta'nha' ri na'. Peucawo' Eun ku kaw cang meuh sa'hki' ka. <sup>6</sup> Hk'a' kaw peue suk'seun' ye na', a saec' meuh maeé' pe' maeé' peue na', ye hkuin' duing hot' ri sok a.

A lawn meuh htan meuh ye peue caee Eun Hkrit na' ko', ye saec' kah pe' yeuh keunhaw' a ku kaw cang. <sup>7</sup> Daecti yam ut' ye maeé' pe' na', ye hpum' onawn' seun' ma na' roksa' ka o'ngak na' eun ko'. <sup>8</sup> Leumeus' ye pe' nyawk' na', ye ren'kawn tuil' pal leukah' mun' ren'kawn Eun Peucawo' na' ri pe' a hkuin' nang hk'o', saec' meuh a'yu ye na' ye ku sum' tuil' a yeut, kopti keut' pe' ri meuh peue leumeus' ye pe' nyawk' hawc'. <sup>9</sup> Ec'awng' na' pe', yawng ye kuit rot pun pe' ri kan' cin tukhka yeuh ye a'neng na' yeut. Yam sangsawn' ye leukah' mun' ren'kawn Eun Peucawo' ri pe' na', punta kaw a un' meuh beus ri pe' saec' ti peue na', ye yeuh kan' gawm' sum' gawm' seunyi.

<sup>10</sup> Yam ut' ye maeé' peue yum' na' pe', meuh ye peue seunga' chak', leupaws seumeu' maeé' un' kue' vang ri na' pe a'neng na', pe' ri maeé' Peucawo' Eun ku kaw cang meuh sa'hki' ka yeut. <sup>11</sup> Kopti tup yawng pe' a, yeuh ye ri pe' seun' kuing' na' yeuh eun ri kon' ri na' ce ko'. <sup>12</sup> Ye tuil' kaw' reng pe', seueul' hpum' pe' maeé' kah pe' a'yu im' kuing' hpaw maeé' Peucawo' Cawo' klawng pe' ing' lec nang kuing' ri maeé' munhpung' ri na' Eun.

<sup>13</sup> Ye mun' keuting ri Peucawo' Eun laleung kopti yam rap pe' ri ti leukah' mun' Eun Peucawo' sangsawn' ye ri pe' na', pe' hkuin' rap ri ti a seun' meuh a leukah' peue, daecti pe' rap ri ti a hot' meuh a leukah' neumneum na'. A meuh leukah' Eun Peucawo'. A yeuh kan' hk'a'naee peue yum' na' pe'. <sup>14</sup> Ec'awng' na' pe', pe' ku seun' muk kon' Hkrit Eun Peucawo' ut' hk'a'naee Yesu' Hkrit Eun ut' nang kuing' Yu'da na' ce ko'. Pe' pun ri hkam' ku tukhka neum peue kuing' pe' na' ce, a ku seun' muk kon' Hkrit awn' pun ce

ri hkam' ku' tukhka neum peue Yu'da na' ce na'. <sup>15</sup> Ce toh Cawo' Yesu' Eun mae'e' toh peue suip leukah' Eun Peucawo' na' ce. Ce ra ri tec e'. Ce yeuh Peucawo' Eun hpum' un' sam'ran. Ce meuh ransu ri peue gawm'euc' <sup>16</sup> ri ham'tap ce kaw e' un' cang sangsawn' peue un' meuh peue ceu Yu'da na' ce kaw pun hk'a' htut lawtpon na'. Kopti yeuh ce keutit' na', ce baet ri yeuh map' na' nuknhen' ri. Vang tisut' ka na', hk'a' seungeueng' Eun Peucawo' na' a kaw rot hk'a' pang ce.

*Paw'lu sum' heul' glue eun ri muk kon' Hkrit Hte'salo'ni' na' ce*

<sup>17</sup> Ec'awng' na' pe', yam pun ye ri hk'akcak' pe' ti vut ti yam na' (hk'akcak' e' tu' ri yawo, hpum' e' a hkuin' hk'akcak' puri), kopti tang sum' hk'eup' nyu ye pe' nyawk' na', ye sae'caee' co'ca' ri kaw tang hk'eup' nyu pe' bae. <sup>18</sup> Ye sum' ing' ri pe' nyawk' neumneum. Lheu' awn' na, ui' ri, meuh ui' Paw'lu. Ui' jaen sum' ing' ri pe' ti pok hawc' ti pok, daecti Satan na' a ham' ye. <sup>19</sup> Kopti yam Cawo' e' Yesu' na' Eun tang lih na', vang keutui' hpum' ye, vang ren'kawn ye, mae'e' cui'maw hk'il' ku' kaw ye pun munhpung' ri nanggal' Eun na', a ci' meuh keunhaw'? Meuh ka pe' ri hawc', un' meuh ka aw? <sup>20</sup> Kopti meuh pe' munhpung' mae'e' hk'a' ren'kawn ye neumneum.

### 3

*Paw'lu mae'e' Silas' cus' ka Ti'mo'se eun heul' nang veng Hte'salo'ni'*

<sup>1</sup> Kop awn' na yam eut' un' pun ye a na', ye kuit ri kaw tec ya nang veng Ehten na' a na' chak', ye kuit a deut. <sup>2</sup> Ya cus' Ti'mo'se ku' meuh awng' ya na' eun heul' ri pe'. Hk'a'naee vang sangsawn' leukah' mun' ren'kawn Eun Hkrit na', eun ku meuh a'mawo nang yeuh kan' mhai' Eun Peucawo' mae'e' ya tiduih'. Ya cus' eun heul' tuil' kaw' reng pe' punta

kaw pé kue' kawlréng hk'a'naee hk'a' yum' ná, <sup>3</sup> maeé punta kaw pé un' kue' nang keuyuih' fuii'fai' hk'a'naee ku' tukhka aen' ce saec' ti peue ná. Peucawó rangraen Eun ri tang' pé kaw hkam' ceu nang aen' ce ná pé ku yawng a meulamlam ri yeut. <sup>4</sup> Saec' meuh yam ut' ye maeé pé ná ye lah' é kaw pun ri hkam' ku' tukhka ná, a ku seun' ku' lah' ye ná neum, pé ku yawng a yeut. <sup>5</sup> Kop awn' na, yam eut' un' pun uí' a ná, uí' cus' Tí'mó'se eun heul' nom' nawk hk'a' yum' pé ná. Lhat' uí' ku' cop' ná cang heul' cop' long a pé ri ku' ti ri ceu. Kan' ku' co'ca' ye ri yeuh ná a ná cang meuh ku' hk'o' hk'awng'.

*Tí'mó'se lah' eun kan' chak' ri Paw'lu*

<sup>6</sup> Daecti maet'maen' Tí'mó'se tang ing' rot eun hawc'. Eun ing' ris ya mhawng' leukah' ren'kawn lawng hk'a' yum' maeé hk'a' leumeus'keus pé ná. Eun ku lah' ya mhawng' lawng kuit rot pé ri ku' chak' yeuh ye laleung ná maeé lawng seun' sum' nyu ye pé ná pé ku tang sum' nyu ye yeut. <sup>7</sup> Ec'awng' ná pé, yam pun ye ri hkam' ku' tukhka keunhap' nokneh ná gawm'euc', ye pun kawlréng ri kopti meuh a hk'a' yum' pé ná. <sup>8</sup> Kopti cawng keutawn' pé hk'a'naee Peucawó Eun ná, maet'maen' ye áyu im' neumneum. <sup>9</sup> Kopti meuh ka pé ri, ye kue' hk'a' ren'kawn nanggal' Eun Peucawó heun'. Yam kuit ye hk'a' ren'kawn aen' ce gawm'euc' ná, ye mun' keuting ri Peucawó Eun nyawk'. <sup>10</sup> Punta kaw ye tang hk'eup' nyu pé baeé vang un' nuk ka hk'a' yum' pé ná, ye sae'caee' hk'o' mun' gawm' sum' gawm' seunyi.

<sup>11</sup> Maet'maen', kah Kuing' Peucawó Eun maeé Cawó Yesú Eun mhe' hk'a' kaw é tang hk'eup' nyu puri ná reu'. <sup>12</sup> Kah Peucawó Eun yeuh hk'a' leumeus'keus pé ná nukveh hk'a'pang pé ti peue hawc' ti peue maeé hk'a'pang peue seubu ná ce gawm'euc' seun' leumeus' ye

pe' na' reu'. <sup>13</sup> Punta kaw pe' seunga' chak' un' laee kue' vang ri nanggal' Eun Kuing' Peucawo' yam Cawo' Yesu' e' na' na' Eun tang lih mae' peue seunga' chak' ri na' ce gawm'euc' na', kah Peucawo' Eun yeuh hpum' pe' na' kue' kaw' reng nhim' reu'.

## 4

### *A'yu im' hit' hpum' Eun Peucawo'*

<sup>1</sup> Ec'awng' na' pe', leukah' tisut' na', pe' kaw htuk' ri a'yu im' hit' hpum' Eun Peucawo' yeuh sa'nhaw' na', ye sangsawn' pe' ri ka hawc'. Neumneum ka na' ko', pe' ku lak' yeuh a hawc'. Daecti maet'maen', hk'a'naee Cawo' Yesu' Eun, ye sum' hk'o'hk'ang tuil' kaw' reng pe' gawm yeuh a lheu' awn' na. <sup>2</sup> Kopti tup yawng pe' leukah' sangsawn' tuil' ye ri pe' ri ti'ca Eun Cawo' Yesu' na'.

<sup>3</sup> Kaw pe' pun ri saic' ri seunga' chak' na' cawp' a alo Eun Peucawo'. Kop awn' na, pe' kaw pun ri vel hk'a' hkuit'nawng'tang' na'. <sup>4</sup> Pe' ri ku peue, sawng' ut' mae' beun' ri na' ce meulamlam ri hk'a'naee vang seunga' chak' na' mae' vang hkopyawm' yumyam' na' reu'. <sup>5</sup> Pawlaee va ri hot' hk'a' hkuit'nawng'tang' na' seun' ku' yeuh ce peue un' yawng Peucawo' Eun na'. <sup>6</sup> Pawlaee kah a'nhaw' yeuh pon yeuh lheu', yeuh kleuc' ceu nang aen' ce ri ec'awng' ri na' ce saec' ti peue. Peucawo' kaw Eun ciyang peue yeuh map' yeuhki' na' peue seun' ku' tawn lah' tawn tuil' ye sati pe' na'. <sup>7</sup> Kopti Peucawo' hpaw Eun ca' klawng e' kaw meuh peue un' seunga' chak', daecti kah Eun e' a'yu im' hk'a'naee vang seunga' chak' na'. <sup>8</sup> Kop awn' na, a'nhaw' lawn tecla leukah' sangsawn' aen' na ko', eun hkuin' tecla peue, daecti tecla eun Peucawo' Cawo' tuil' Cit' seunga' chak' ri na' ri e' na' Eun.

<sup>9</sup> Lawng hk'a' leumeus'keus pe' ec'awng' na', ye hkuin' kaw lo' ri tem' a ri pe'. Kopti kaw pe' leumeus' puri na',

Peucawo' sangsawn' Eun pe' hawc'. <sup>10</sup> Neumneum ka na' ko', pe' ku leumeus' ec'awng' ut' nang kuing' Masido'ni' na' ce gawm'euc'. Daecti ec'awng' na' pe', ye sum' hk'o' pe' na' gawm baet ri leumeus' ec'awng' na' ce heun'heun'.

<sup>11</sup> Pe' na' yeuh ri a'yu im' ut' cumyen', sawng' yeuh kan' ri mae' yeuh kan' ri ti' ri na' seun' ku' lah' ye ri pe' na', <sup>12</sup> punta hk'a' a'yu im' pe' ku seunyi na' kaw a meuh hk'a' yumyam' ce peue ut' hk'a'nok na' mae' kaw pe' un' lo' ri cu a'nhaw' na'.

### *Peucawo' kaw Eun tang lih*

<sup>13</sup> Ec'awng' na' pe', ye sum' kah pe' yawng lawng neumneum ce peue yeum heul' hawc' na' mae' un' sum' kah pe' kuit nyhap' seun' peue seubu ku' un' kue' vang keutui' hpum' na' ce. <sup>14</sup> Yesu' yeum Eun hawc' Eun tang kuh' im' na', yum' e' a. Kop awn' na, peue yeum hk'a'naee Yesu' Eun na' Peucawo' Eun kaw tang yeuh ce kuh' im' mae' Yesu' Eun na', e' ku yum' a yeut. <sup>15</sup> Lah' ye a hot' leukah' lah' meun Eun Peucawo' na' ri pe', peue kawn' a'yu im' kawn' vang rot ti yam Cawo' Peucawo' tang lih Eun na' e', neum, e' hkuin' kaw pukal' nanggal' ce peue yeum heul' hawc' na' ce. <sup>16</sup> Kopti Cawo' Peucawo' kaw Eun lih neum kuing' pang ma' na' mae' leukah' tuil' Eun seng' laws' nyawk' na', mae' seng' eun ro' keuting ce in'hpom ti peue na', mae' seng' pi'tae' rae' Eun Peucawo' na'. Yam awn' na, peue yeum hk'a'naee Hkrit Eun na' ce kaw tang kuh' im' nanggal'. <sup>17</sup> Hawc' ko', punta kaw e' huk' hk'eup' Cawo' Peucawo' Eun nang vawo na' mae' punta kaw e' ut' mae' Heun cot'cu ri na', ku' kawn' a'yu im' kawn' vang na' e', e' na' pun ri yuk ri huk' mae' peue awn' ce pang putum' na' tiduih'. <sup>18</sup> Kop awn' na, tuil' kaw' reng pu pe' ri lawng aen' na ti peue hawc' ti peue reu'.

## 5

<sup>1</sup> Ec'awng' na' pe', ye hkuin' kaw lo' ri tem' ri tuil' lawng ka sa'hkat' meuyam na' ri pe', <sup>2</sup> kopti seunyi Eun Cawo' Peucawo' na' kaw a rot seun' peue con' ing' rot ce peunsum' na' ko', pe' ku yawng a meulamlam ri. <sup>3</sup> Yam lah' peue a ri puri, "Kuing' na' a cumyen', a sa'pa sam'ran", yam awn' na, ku' lulaic na' a kaw keulawn' rot hk'a' pang ce seun' ku' sui' na' rot a ri beun' sui'awng' na' eun ko'. Peue awn' ce hkuin' kaw laee lawtpon.

<sup>4</sup> Daecti ec'awng' na' pe', kopti un' ut' pe' vang duim'lawng na', seunyi meuyam awn' a hkuin' kaw yeuh pe' lhat' ruing seun' peue con' ing' ce na'. <sup>5</sup> Pe' ri gawm'euc', meuh pe' peue ut' hk'a'naee ku' ceng' na' mae' hk'a'naee peunnyi na'. E' un' meuh peue ut' hk'a'naee peunsum' na' mae' hk'a'naee ku' duim'lawng na'. <sup>6</sup> Kop awn' na, pawlaee va ri seun' peue seubu ku' buih pun ri it' na' ce. Daecti kah ri hk'awn' sawng' u'peung tu' ri na'. <sup>7</sup> Kopti, peue pun ri it' na', it' ce peunsum'. Peue yuic' ri plai' na', ce ku yuic' peunsum'. <sup>8</sup> Daecti kopti meuh e' peue ut' hk'a' peunnyi na', e' na' sawng' u'peung tu' ri na' pawh. Cuip' hk'a' yum' na' mae' hk'a' leumeus'keus na' meuh hpa'la ri nuk' ri na'. Cuip' hk'a' keutui' hpum' ka hk'a' htut lawtpon na' meuh cui'maw lhec' ri ti. <sup>9</sup> Kopti Peucawo' hpaw Eun ca' hkvet' ti uin' e' kaw hk'eup' hk'a' seungeueng' peulel ri na'. Daecti Eun hkvet' ti uin' e' kaw pun hk'a' htut lawtpon na' ri Cawo' Yesu' Hkrit e' na' Eun. <sup>10</sup> Yam tang lih Eun na', e' saec' im' e' saec' yeum, punta kaw e' pun ri ut' tiduih' mae' Heun na', Eun pun ri yeum pun e'. <sup>11</sup> Kop awn' na, tuil' kaw'l'reng puri yeuh puri huk'hawn' keutawn' seupit seun' ku' buih yeuh pe' na' reu'.

*Leukah' sangsawn' tisut'*

<sup>12</sup> Ec'awng' na' pe', peue yeuh kan' reng hk'a'naee pe' na' ce, peue u'peung roksa' pe' hk'a'naee Cawo' Peucawo'

Eun na' ce mae' peue tuil' sati pe' na' ce, maet'maen' ye hk'o' pe' hkopyawm' ri ce. <sup>13</sup> Kopti meuh a kan' ku' yeuh ce na', leumeus' ce, tang' ce keuting lhung' hkopyawm' ri ce reu'. Yeuh ri kuit nyawk' kuit sam'ran cumyen' ut' tiduih' reu'. <sup>14</sup> Ec'awng' na' pe', ye hk'o' pe' tuil' sati ce peue keunah na', tuil' kaw'l'reng ce peue hpum' keuceum na', teum'kawm peue kaw'l'reng kloe na' ce, eut' hpum' yeun'hkam ri peue gawm'euc' reu'. <sup>15</sup> Keue' meulamlam ri, pawlaee kah a'nhaw' yeuh ri top' ku' rai na' ri yeuh ku' rai na'. Daecti, co'ca' ri yeuh ku' chak' na' ri puri gawm' peue seubu gawm'euc' na' ce laleung reu'.

<sup>16</sup> Saec' yamnhaw', ren'kawn reu'. <sup>17</sup> Saec' yamnhaw', hk'o' mun' reu'. <sup>18</sup> A saec' na' yeuh sa'nhaw', mun' keuting ri Peucawo' Eun reu'. Kopti ceu nang aen' ce meuh ka alo Eun Peucawo' pun pe' hk'a'naee Yesu' Hkrit Eun.

<sup>19</sup> Pawlaee juit' ngawl ka Cit' seunga' na' awh. <sup>20</sup> Pawlaee un' nawpsang leukah' tamnai Eun Peucawo' na' awh. <sup>21</sup> Caet ri nawk ku' ceu na' ce reu'. Jhawp' ku' chak' na' reu'. <sup>22</sup> Vel ku' rai na' ku' ceu ka reu'.

<sup>23</sup> Kah Peucawo' Cawo' hk'a' kuit nyawk' kuit sam'ran cumyen' na' Eun saic' pe' seunga' chak' meun reu'. Yam Cawo' e' Yesu' Hkrit tang' lih Eun na', kah jawngku' tu', hpum' mae' cit' civit pe' na' un' laee kue' vang ri reu'. <sup>24</sup> Cawo' klawng pe' na' kati keutawn' Eun. Eun kaw yeuh ku' lah' ri na'.

<sup>25</sup> Ec'awng' na' pe', hk'o' mun' pun ye awh. <sup>26</sup> Yam hk'eup' puri na', gloh' ti' puri hk'a'naee vang seunga' chak' na' reu'. <sup>27</sup> Tawm' ye leukah' ri pe' nangg'al Eun Peucawo', lip ec'awng' gawm'euc' na' ce mhawng' htawm aen' a reu'.

<sup>28</sup> Kah mun' sin' Eun Cawo' Yesu' Hkrit e' na' kue' ri pe' reu'.

**Plang**  
**The New Testament in the Blang language of Myanmar**

copyright © 2021 Wycliffe Bible Translators, Inc.

Language: Plang (Blang)

Contributor: Wycliffe Bible Translators, Inc.

All rights reserved.

2021-04-06

---

PDF generated using Haiola and XeLaTeX on 19 Oct 2021 from source files dated 14 Jul  
2021

0468b0b5-acb2-59c4-92d3-4fa09a4d091c